

編號 3 號

【火燒竹園】郭亭好原作

記得該係佢十歲該年个熱天，寮日莊肚个細人仔做下籍在大樹伯公个牆身頂，蹶起蹶落搞到哈哈滾。阿志牯搞懶咧，斯湊大家共下去河壩脣搞水、焙煙腸，佢講：「愛共下去个人搵拈樵斯好咧，伸个佢來負責！」聽著有好空个，大家相爭愛踦。歸陣細人仔斯踦等阿志牯轉去佢屋下準備東西。佢拗出一隻西瓜，過膠厥婆晒在禾埕竹篙頂个煙腸割一串下來，帶等報紙、賴打、箸、洋刀仔這兜，歸陣細人仔斯嘻嘻哈哈共下飄去河壩脣焙煙腸咧。

阿志牯先撈西瓜浸在水竇肚，過用幾隻石頭砵等，佢講：「恁樣等加下斯有冰冰涼涼个西瓜好食哩啲！這下你兜去拈樵，佢來起火。」為著做得遽兜食著香噴噴个煙腸，佢兜盡命拈拈，緊抔燥樹桠、竹殼分阿志牯起火。火一下斯猛咧，一儕分一條撞等箸个煙腸，跔共下撈煙腸放在火面頂焙。阿志牯緊交代講：「煙腸愛記得貶面，正毋會臭火燒哦！」有兜人較毋壁，歸條煙腸焙到烏疏疏，毋過大家還係食到暢靈靈仔。

佢兜當在該食煙腸、傍西瓜有講有笑个時節，嘎無注意著火還在該著，風一吹，一下斯遽開來。火緊遽緊闊、緊燒緊猛，等

到大家看著，既經忒慢咧！阿姆哀正得！這火撈脣頭个竹園燒到嗶嗶嘖嘖，大家來毋掣撈煙腸抔忒斯遽遽走去救火，有人拿油紙絡仔張水、有人抔沙仔，毋過火越來越猛，燒氣灼¹到大家想愛救火都無法度行兼。遠遠在田肚做事个阿伯、伯姆這兜，看著衝到半天高个煙也走來想愛搵手，佢兜看著火實在忒猛，毋像勢咧！遽遽喊消防隊來搵救火，該載消防隊當遽斯趕到，正撈火滅忒。

佢兜歸陣細人仔搵到滿頭滿面烏疏滴落，嚇到面壠青。轉屋了後好戲正愛上棚，有兜分世大人用竹修仔抔、有兜用衫吊仔拌、也有人透夜跪到天光。第二日在去讀書个路町相堵頭，逐儕手脛、腳髀做下分大人修理到一浪一浪、烏青紫嘔，咒誓講絕對毋敢再過搞火咧！

這下想起該擺火燒竹園，係天恁大个事情，好得有爺哀孩等，撈大事化小事，佢兜細啞仔正做得平安順序；好得有爺哀个教示，佢兜正知得是非重輕。正經還懷念佢該毋知頭天、有爺哀保護無愁無慮个童年啊！

¹ 灼：音 ho^ˇ；被熱氣燙到、薰著。

編號 5 號

【迎龍】鄭孝國原作

過年个時節，有豐沛个團圓飯，有砵年錢好領，還有紙炮好打，也有當多生趣好搞个齣數，正經係三日三夜都講毋煞哦！除忒這兜，還有一種係佢最有興趣个活動，該就係——迎龍。

佢戴在苗栗這隻客家莊，這位有別位罕得看著个客家傳統活動——迎龍。對過年前開始膏龍、牽龍，大概對正月初九天公生開光點眼過後，連連續續个活動——迎龍、煬龍、跔龍正式開始，滿哪仔鬧熱煎煎。愛直直到正月十八該日子時化龍歸天，這活動正算圓滿結束。

佢最好箭等自行車無就騎奧多拜跔等龍隊，到各莊頭去看龍隊表演，還會訂工去查今晡日哪位有包龍，佢就提前到該號位仔。等時間一到，包龍个店頭家，會打各種个紙炮、天花炮。一開始還看得著迎龍个人在該鑽上鑽下、跳來跳去，到紙炮越煬越猛，目珠前歸片濃濃¹，既經看毋真迎龍个人馬，單淨看著一條龍在紙炮陣肚騰雲駕霧，這時合等並令砰浪个紙炮聲，正經分人感覺著虔誠、鬧熱又吉祥。

¹ 濃濃：音 ngiung ngiung；煙霧瀰漫貌。

「迎龍」，係佢最中意个過年活動，因為佢毋單淨生趣、鬧熱，還表現出客家藝術个靚。迎龍又有人講「搞龍燈」。龍圈仔係用竹篾編个，頂高貼等靚靚个布紗，再過門上竹棍變成做得擎起來迎个龍燈。撈這龍燈一節一節恭成龍身，最尾撈龍頭、龍尾接上去，哇！金晶曠燿²个色目實在還打眼哪！龍頭撈龍尾最講究，全愛照規矩來，正做得「慢工出幼貨」，係講一無注意，全無精氣神韻，該就爭大碼咧！除忒膏龍愛注意以外，龍愛迎來生、迎來順序，全食擎龍珠个人指揮。龍本身就當重，加勝迎龍係多人合作个表演，一無配合好，就會漏氣³，毋係龍打結，就係人跔倒⁴。為著表現出龍个精神撈活跳，愛迎來好，定著愛煞猛練習正會鬥搭，正做得表現出力頭撈美感。

年節活動千百樣，佢最中意个就係迎龍，毋單淨係因為迎龍這活動鬧熱又生趣，還因為龍本身也係客家精神个信仰代表。另外，膏龍个功夫也係客家手工藝術个傳承。所以佢當欣賞迎龍，也歡迎大自家有閒來佢个家鄉，共下來欣賞這精彩个年節活動——迎龍。

² 金晶曠燿：音 gim` zi` ngiab lang`；物品的外貌亮晶晶。

³ 漏氣：音 lau` kui`；閩南語借詞。比喻行為表現令人失望。

⁴ 跔倒：音 doi` do`；跌倒。

編號 6 號

【四季个感動】李怡蘋原作

佢屋下脣頭有一隻細公園，對佢間肚个窗門看出去，堵堵好撈一頭大樹相對面，一年四季，佢長下探頭出去看佢千變萬化个面貌。青葉、白花、黃枝，還有在大樹下石凳頂坐奈个人，無論春夏秋冬都像一幅幅靚靚个圖畫，佢單淨坐等看就做得感受著四季个變換。毋過，四季分佢感受著个毋單淨係靚到耐毋得个景色，還有个就係佢對人生个體會。

今年新春時節，空氣裡肚都係春天甜甜个味緒，萬物都有新氣象，佢屋下也有好事來到。四十零歲个滿叔，望恁多年總算分佢望著一個妹仔咧。這細嬰兒肉卒卒个臉身，紅冬冬仔个面頰卵，還得人惜哦！人講，人个一生可比一年四季，恁樣，這正出世个細老妹應該算係春天咧！佢幼幼嫩嫩个手指公，就像春天樹極頂正綻出个嫩芽，佢人生个四季正開始，定著愛當細心細意照顧，望佢定定仔大。

想啊想仔，這十過年來，爺哀毋知費忒幾多个心力，正有好撈佢對細細隻仔撚¹到這下恁大人。來到人生夏季个爺哀，愛擔起

个責任重、壓力大。佢兜當像熱天个大樹，風搓來發風落水，為著遮等一屋下人，高大个樹梗愛耐等企到澄澄；在熱燂燂个日頭下，甘願自家分日頭晒，也愛用青溜溜个樹葉仔抵等坐在樹下个偃兜。

人講：「春有百花夏有風，秋有月華冬有雪。」這係四季無共樣个景色，也係人生變換个過程。佢兜个腳步緊行緊遠，年堵年毋識停跔，一隻正愛來，一隻煞煞就走咧，毋堵好一眨眼這四季就過忒咧。有一擺，佢姆看等該頭大樹柔柔仔講：「秋天一到，這樹葉敢怕就愛離枝咧。」佢知佢姆想著明年佢愛去外背讀書當毋盼得，佢安慰佢講：「毋怕啦！等春天時節佢就倒轉來咧啊！」

前一駁仔聽佢姆講，窗門外背該頭大樹老咧、著病咧，佢心頭一顫。係啊！佢仰無想著爺哀有一日也會行到人生最尾个季節呢！春天會再過來，毋過人生个四季斯無再過一輪个機會啊！從細，係佢兜陪等佢，一年過一年感受四季無共樣个感動。係有一日，佢兜个冷天來咧，換佢做佢兜燒暖个細日頭，陪等佢兜共下回憶人生中每一隻感動个春夏秋冬。

¹ 撚：音 ngien^ˊ；拉拔長大之意。